



**Nakorsat namminersortut nakorsiartarfimmik ingerlatsinissaminnut inatsisitigut allatigullu aporfigisinnaasartagaannik Naalackersuisut UKA2019-mut misissueqqullugit peqquneqarnissaannik Inatsisartut aalajangiiffissaattut siunnersuut. Misissuinermilu siunnersuutigineqassaaq aporfiusinnaasut qanoq aaqqinneqarsinnaasersut.**

(Inatsisartunut ilaasortaq Siverth K. Heilmann, Atassut)

(Siullermeerneqarnera)

Inatsisartunut ilaasortaq Sivert K. Heilmann matumanga siunnersuummik saqqummiussimmat qutsavigaarput.

Atuarsinnaavarput inatsisitigut aporfissaqanngitsoq nakorsat arlaat namminersorluni nakorsiartarfimmik pilersitserusussappat, tamannalu qujanaqaaq.

Ilaqutariinnermut Peqqissutsimullu Ataatsimiititaliami qujanartumik periarfissaqartuarpugut politikkikkut suliarput tunngavigalugu peqqinnissaqarfimmi aqutsisunut attaveqarnissatsinnut, taakku ilungersortuarpugut oqaluttuukkumalluta suut ajornartorsiutaanersut uangalu inuttut tamanna assut qujamasuutigeqaara.

Politikeritut assigiinngitsut arlallit eqqumaffigisariaqarpagut, tassaavorlu siunissaq, siunissaq tulliani aningaasanut inatsisip suliarinissaata tungaanit ungasinnerusoq.

Peqqinnissaqarfimmut ilungersorfiusumi aningaasartuutit qiviarutsigit takusinnaavarput ukiuni kingulerni aningaasartuutit qaffakkiartupiloorsimasut.

Pissutsit assigiinngitsorpaaluit pissutaapput aningaasartuutit qaffakkiartornerannut, pissutsit tamakku imatut sunniuteqarfigisinnaanngilagut avatitsinniit sunniuteqarfigisinnaanngisatsinniit piummata, aamma inuit eqiterunnerat pissutaaqataavoq, nunami maani aammali nunani allani avannerlerni assersuuffiginiartakkatsinni.

Teknologimi ineriartorneq sukanerujussuarmik ingerlavoq, taava qarasaasiat, inuusaliat internetilu siunissamimita qanoq iluaqutigilersinnaassavagut?



Qarasaasiami inuit naapittarfii tupinnaannartumik inuunitsinnut sunniuteqartarput assersuutigalugu nunatsinni peqqinnissaqarfimmut isummagut taakkunangaanniit sunnerneqarsinnaasarmata.

Qanoq akulikitsigisumik taakkunani atuartarpagut inuit peqqinnissaqarfimmik nersuaalarinnittut allanut peqqinnissaqarfitsinnut naammagittaalliortut allassimasaannut naleqqiullugu?

Ilissi nammineq 20-nik ukiulittut suleriniarnerlusi qinissagussiuk, taava peqqinnissaqarfimmi sulilerumaarnissaq toqqassagaluarpisiuk? Peqqinnissaqarfimmi sulisut pigiinnartassagutsigit nunaqqatitsinnik ilinniartitsisariaqarpugut, taama oqarpuq peqqinnissaqarfimmi aqutsisut, taavami tapersersussanngilagut oqalliseriaaserpullu isornartorsiuiuiaannavissoq eqqarsaatigeqqilaarlugu? Qanormi iliorluta inuusuttagut kammattorsinnaavagut peqqinnissaqarfimmi sulisussanngorlutik ilinniassasut, tamanna uanga nammineq ilisimasaqarfignerorusukkaluarpara.

Avatangiisitsini pisorpaalussuit politikikkut iliuuseqarfigisinnaangilagut, assersuutigalugu inuit eqiterunnerat susinnaangilarput aamma teknologimi ineriartorneq, aamma nakkutigisinnaangilarput tusagassaqartitsivinni suut allaaserineqartarnersut imaluunnit qarasaasiami inuit naapittarfiini qanoq allattoqartassanersut aalajangersinnaangilarput kisianni pissutsinut taakkartorneqartunut tulluussarluarnerusinnaagaluarpugut.

Ingerlalluartut ilagaat qarasaasiakkut nakorsiartarfik nutaaq Pipaluk, tassani avinngarusimasuni najugallit qarasaasiaq iluaqutigalugu nakorsamik oqaloqateqarsinnaapput, qarasaasiakkut nakorsiartitsisarnerup nukippassuit atorlugit nakorsassarsiortarneq pinngitsoortissinnaavaa, tamannami ullumikkut nukippassuarnik atuiffiuvoq atorfiillu inuttassarsiuttarnerat aningaasarpaassuarnik atuiffiusarluni, nakorsatulli atorfiit tassaapput nakorsaqtinik isumassarsioqatigiiffiusinnaanngitsut, aamma eqqortunik piginnaaneqarneq ajorput immikkoortuni aalajangersimasuni immikkut piginnaanngorsakkat pineqartarmata aamma imaassinnaavoq nakorsatut sulinissaminnut misilittagaqarpallaanngitsut, paarlattuanilli nunami maani peqqissaasoqarpugut pikkorissorsuarnik, ilinniartinneqarsimasunik allaat nunani avannarlerni allani peqqissaasut suliarisinnaanngisaannik suliaqarsinnaanngorlugit aamma periarfissaq manna atorlugu oqaatigerusuppara isumaqarama akissarsiaat piginnaasaannut naleqqiullugu appasippallaartut.

Peqqinnissaqarfimmi ajornartorsiutit qaangersinnaanngilagut oqaannarluta siunissami nakorsatut atorfiit tamaasa inuttalerumaarlugit, sumummi iluaqutaassava sinerissap ilaani arlaanni nakorsamik



atorfinitsitsigutta suliaminik naammaginatsumik naammassinnissinnaangitsumik, pingaarnersaavoq qularnaassallugu napparsimasut eqqortumik nakorsartittarnissaat.

Aammali immaqa aperisinnaavugut immitsinnut piffissanngunnginnersoq immitsinnut paarilluarnersalernissarput timikkut peqqinnissakkullu, piffissap ilaani qaquguussagaluarnersoq inuulluataarpallaarnerup piliaanik nappaateqalerumanata, tamannami pinngitsoortinneqarsinnaammat inuunermik allanngortitsinikkut.

Politikkikkut siunissami peqqinnissaqarfik qanoq ittoq pigilerumaarnerullugu takorluuisinnaasariaqarpugut immaqa nassuerutigutsit avatangiisitsinni ineriartorneq naleqqussarfigisariaqarlugu malittaaniillu aaqqiissutissanut siunnersuuteqarsinnaanngorutta immata ajornannginnerulissaaq piviusorsiornerusumik aningaasanut inatsimmi aningaasaliissutissanik immikkoortitsisalernissarput.

Namminersorlutik nakorsiarfiutillit nakorsat Naalakkersuisut akissutaanni pilersissallugit aporfissaqanngillat kisimilli aqutissaanngillat, taamaattumik siunissamut ungasinnerusumut takorluuertiarta, taamatut oqaaseqarluta siunnersuut itigartinneqassasoq inassutigaarput.

.